

MEDIEVUM

FISM

U 29 di settembre di u 2020

Nome :

Casata :

Puntu generale di storia di u Medievu in Corsica

Versu l'anni 590-604, u Papa Gregoriu u Magnu hà a primura di a sorte di a Chjesa di l'isula chì strazieghja à urganizàsi è deve dà capu à e cridenze pagane di e pupulazione di l'internu.

E lettere di San Gregoriu u Magnu

Di e 848 lettere scritte da u papa Gregoriu, 10 sò dedicate à a Corsica (menu di 1%):

1 – À u mese di ghjungnu di u 591, l'abbate Orosiu riceve l'ordine da Gregoriu u Magnu di fundà un monasteru in Corsica è di rimette in ballu un modu di vita degnu in l'abbazia di a Gorgona. Sarà sustinutu da u Defensor Symmachus chì garantirà a parte più "seculare" di a l'opera.

Cui prefato Orosio iniunximus ut in Gorgonae insula perexeat, cum quo tua experientia pariter eat. ... Ita igitur experientia tua faciat, ut ex utraque re, id est vel providendo in Corsica monasterio, vel corrigendis monachis in Gorgona, non nostrae, sed voluntati omnipotentis Dei parere festines.

2 - 3 lettere à u mese d'aostu di u 591:


- Dumanda à i sacerdoti di campà in un modu adattu.
- Mintuveghja a chjesa di Sagone, abbandunata à a morte di u so vescu chì nimu hà riesciutu.
- Parla di a distruzione di a chjesa di Taina (pò esse in Balagna) da a pupulazione nemica.

3 - Ghjugnu di u 595: U Papa scrive à a moglie di l'Imperatore bizantinu per denunzà a tassazione imposta da l'orientali in Corsica è a rivoluzione di i Lombardi Corsi cù quale a coabitazione pare più pacifica.

4 – Ottobre di u 596: Missiva à u Governatore bizantinu di l'Africa dumandemu u riturnu in l'isula d'un amministratore chì avia avutu una azione benefica nantu à a pupulazione.

5 – Ghjennaghju di u 596: Dumanda à u vescu d'Aleria di costruì una chjesa è un battisteru in "Cellae Cupiae" nant'à u Monte "Negeunus".

6 - Settembre di u 596: U Papa scrive chì i Corsi preganu sempre l'iduli pagani è a natura cum'è divinità è dunque dumanda di piglià misure spirituale è concrete per rimette u pòpulu nantu à a strada di a Chjesa rumana.



7 - In a so lettera di settembre 597, u papa Gregoriu u Magnu scrive à u vescu d'Aleria in Corsica. Li dumanda, cù queste parolle, di mette i corsi nantu à a strada di a religione cattolica:

« Et ideo fraternitatis uestrae sollicitestudeat opus quod coepit auxiliante Domino ad perfectionem deducere. Et situe eos qui aliquando fideles fuerunt sed ad cultum idolorum negligentia aut necessitae faciente reversi sunt, festinet cum indicta paenitentia aliquantorum dierum ad fidem reducere, ut reatum suum plangere debeant et tanto firmiter teneant hoc, ad quad adiuuante Domino reuertuntur [...] rationem reddendo, qui ligna et lapides colere non debent [...] Transmissimus autem fraternitati tuae quinquaginta solidos ad uestimenta eorum qui baptizandi sunt comparanda. »

« Chì a vostra « fraternità » abbia primura di rinnuvà a fede di quelli chì eranu battizati tempi fà ma chì, per indifferenza o necessità, vultonu à l'adorazione di l'idoli, impunenduli una penitenza di pochi ghjorni affinch'elli sguassinu i so difetti è ch'elli torninu più fermamente à a fede cù l'aiutu di Diu [...] spieganduli ancu perchè ùn deveranu più adurà nè legnu nè petra [...] Avemu mandatu ancu à a vostra fraternità Cinquanta soldi per cumprà a roba à quelli chì devenu esse battizati. »

8 – Agostu di u 601: Rapportu di vacanza di i viscuvati d'Aleria è d'Aiacciu.

A sucetà isulana hà vissutu migliaia d'anni prima di l'impiantazione di u Cristianesimu à l'ombra di a religione di a petra è di u legnu, in una chjusura meza aperta per via di u cummerciu.

Eppuru, l'apparizione di u Cristianesimu, impurtatu da Roma è d'Africa, averebbe creatu una vera crisa di mentalità, à u livellu culturale, suciale è ancu mentale. Sta staccatura pare avè seguitatu u populu corsu finu à oghje sottu à a forma di a "religiosità popolare" in sfida à l'istituzione religiosa. Certe pratiche anu ancu francatu a dinamica di a conversione glubale.

Di pettu à e so difficoltà pulitiche, Custantinopuli tralascia à pocu à pocu e pruvince e più luntane cum'è a Corsica. A cristianizzazione di l'isula ne patisce. Da tandu, i papi anu da pratende di piglà in manu l'affari di l'isula di pettu à un putere bizantinu indebbulitu è à un regnu lungubardu aggressivu.

In u 754, una prumessa di dunazione fatta in Quercy, in Francia, da Pepinu, rè francu carulingiu vincidore di i Lungubardi in Italia suprana, avaria - in teuria - fattu di a Corsica una terra "patrimoniu di San Petru" vale à dì pusessu di i Papa di Roma. Ma a Chjesa di Roma ùn hà i mezi di e so pretenzione è li tocca à cercà l'appoghju militariu di i rè franchi.

Da stu mumentu quì, hè creata a legenda di u principe rumanu Ugo Colonna, mandatu in l'isula da u papa Stefanu III cun 1000 fantacini è 200 cavalieri, chì caccia fora i sarracini di u "rè Negolone" dopu à trenta anni di lotta; le guarnigioni di Custantinu V l'imperatore rumanu di l'este perden per sempiternu a zona nord di a Corsica in favore di i Franchi sustenuti da Roma.

In u 777-778, Adrianu u lu richiede u sustegnu di Carlumagnu per ripiglià e pussessione di a Chjesa chì eranu passate sottu à a duminazione di i Lombardi di Pisa è di Lucca chì tenianu parecchi pezzi di terra in Corsica (Codex epistolaris Carolinus, l'annu 778, n.60) in queste parolle: "*in partibus Tusciae, Spoliato solu Benevento atque Corsica simul è Savinensae patrimoniu*".

A strada chì purtava da a penisula italica à l'isula hè stata tracciata trà l'area meridionale di Porto Pisano è, per u più per Aleria è Mariana, almenu finu à u Vlu seculu. Mariana essendu un puntu essenziale nantu à l'assi di rotazione trà Cartagina, Roma è Marsiglia, altu postu di u cumerciu bizantinu.



À partesi da u 1077, Gregoriu u VII (1073-1085) rivendicheghja a suvranità di i papi sopra à a Corsica basendussi nantu à a lascita di Custantinu, vulendu chì Pisa arradicheghji in a petra è nantu à u territoriu a presenza pontifica in l'isula. Per sustene st'andatura, ellu s'arremba nantu à una logistica seculare, prumove l'installazione di i marchesi di a Toscana in Corsica cù i so tituli di marchesi di Corsica ch'elli tenenu dapoi u IXmu sèculu, da Bonifaziu I di Toscana. U papa face di u vescu di Pisa u so vicariu apostolicu. Urbanu II (1088-1099) ferà di Pisa un arcidiócesi in u 1092 offrenduli a suprana sopra à tutti i viscuvi di l'isula. Da stu mumentu di cunquista spirituale, u monachisimu, quant'è arma di penetrazione di fondu di a sucetà isulana, si svilupperà.

À a fine di l'XImu (ma soprattutto à u XIImu seculu), certe grande abbazie in Toscana è Liguria acquistanu terre nantu à l'isula è principianu subito una pulitica di espansione. I monasteri di San Venerio del Tino, San Vito, San Gorgonio de la Gorgone è San Mamiliano di Montecristo prestu diventanu puteri economici in capacità di rivalizà cù i più grandi signori laichi di l'isula.



I Marchesi cullabureghjanu cù a Chjesa, ma ùn mancanu mai di fà ricunnosce a so propria autorità.

Eppuru, u so putere (quellu di i *Corsice marchionis*) hè riduttu pocu à pocu à un picculu territoriu in u nord-ueste di a Corsica. I Marchesi di Toscana è di Corsica si ritiranu pianu pianu, finu à u XIIImu seculu, quand'elli ricunnoscenu a duminazione di Genuva. In u 1123, da quandu Callistu II (1119-1124) caccia i privilegi di Pisa sopra à l'isula, a Corsica si stacca in duie zone d'influenza clericale: Nebbio, Accia è Mariana si trovanu sottu à a sfera genovese

mentre Aleria, Sagone è Aiacciu fermanu sottu à a tutela di Pisa. Hè tandu l'ascensione di e fortezze private.

A situazione si presenterà cusì finu à u 1284 cù a battaglia di a Meloria ch'intervene quandu chì Pisa perde pianu pianu a so influenza nantu à a Corsica.

Finu à a metà di u XIIIu seculu, l'Arcivescu di Pisa hà sappiutu esse ubbiditu da i so suffragani, i benedettini di l'isula di a Gorgona, chì anu fattu aspezzu un inventariu di e so pruprietà è percepitu l'impositi di e so pruprietà in Corsica. L'ospedale di Pisa ùn tralascia i so rami corsi (chì ricollanu à a seconda metà di u XIIIu seculu, ancu in u seculu XIV. Ma, à parte da a metà di u XIIIu seculu, Pisa hè più primurosa di mantene e so ultime pusizione forte u longu di a costa nord-este è di assicurà un pocu d'attività cummerciale. À a fine di u XIVu seculu, ùn ne ferma più nunda. Nantu à u cuntinente, Firenze a supraneghja mentre Genuva si hè stallata di manera durevule in l'isula.

Ci tocca à parlà di a legenda di a Biscia chì campa sempre in a cultura popolare di Balagna. Sta storia ramenta i tempi landani contendu a lotta d'un conte di Corsica contr'à un sarpu (un dragone), un mostro, è ci porta à l'epica di sti marchesi di Toscana è di a so azzione in Corsica, di e so rilazione cù a grande famiglia di i Visconti, maestri di Milanu cù a so stemma rapresentendu un sarpu. Eppure, pare più chjaru è logicu di dì chì sta legenda riporta l'azione di i marchesi di Toscana chì, à fiancu à i frati è i preti, anu lottatu contru à u paganismu è anu participatu à u spanamentu di u Cristianisimu in l'isula.

I signori di u Medievu


I Pinaschi : U ceppu di i signori "Pinaschi" serebbe nativu da u Pinu (Balagna), da quì u so nome, è più precisamente da u paese di Castiglione. Eredi, secondu à Giovanni della Grossa, di unu di i tenenti di Ugo Colonna, i so rappresentanti sò citati in a documentazione scritta, da l'anni 1070-80 induve sò digià chjamati *domini*. Pussedendu una proprietà in Balagna, ma ancu in Nebbiu, questi signori si trovanu trà i primi e più generosi benefattori di i monasteri di San Venerio è in particolare di a Gorgona. I Pinaschi eranu strettamente ligati à i marchesi di Massa in qualità di vassali . Anu tenutu parecchi castelli, Mutula è Ortifusci sò i più maiò.



 Fortificazione medievale.

1 : Purettu ; 2 : Mugliunaccia ; 3 : San Columbanu ;
4 : Castellu à i Pori ; 5 : U Spiluncatu ; 6 : Belgudè ; 7 : Mutula ;
8 : Ortifusci ; 9 : A Vortica ; (Munticellu) ; 10 : Sant' Anghjulu ;
11 : Curbara ; 12 : Sant'Antoninu ; 13 : L'Avazeri ; 14 : Pilone ;
15 : Bracaghju ; 16 : Calvi ; 17 : E Cuntee.

L'Obertenghi : L'origine di l'Obertenghi si volta à Oberto I, marchese di Liguria orientale chì averebbe ricevutu u titulu di Conte Palatinu in u 962 da e mani di l'imperatore Ottone. A "terra obertenga" si stende sopra à Arezzo, Pisa è Lucca è custituisce a matrice originale di e future pussession di a famiglia d'Este discendenti di questu ceppu. U titulu imperiale di marchese di Massa è di Corsica era ereditariu. Questa famiglia venia da Liguria orientale (territoriu di Massa), centru di u so duminiu in l'Xlu seculu; à quale Adalbertu u II, vincitore di i musulmani, hà aghjuntu e terre feudali di a Corsica nord-occidentale. Adalbertu u III (prima di u 1094) perseguì a pulitica di u so predecessore, allora chì da l'eserciziu di u figliolu Adalberto IV (più cunnisciutu cum'è Alberto Rufo), u debilitamentu di i marchesi di Massa principia di pettu à u putere crescente di Genuva. A pulitica di i marchesi in Corsica è dopu in Sardegna hè stata stabilita per via di a so alianza cù Pisa. In u 1186, Oberto di Massa ottene u titulu di ghjudice di Cagliari, mantinutu da u figliolu Guglielmo, da a so figliola Agnese è da a so nipote Adelasia, chì hà purtatu cum'è dota à u maritu Enzo, figliolu naturale di Federicu di Suebia , u marchisatu di Massa è di a Corsica. In u 1248, Fredericu II cede Massa à a cità di Lucca, lascendu solu à a famiglia di l'Adalbertini (in parentia cù l'Obertenghi) u titulu di marchesi di Massa. Durante u XIVu seculu, l'ultime proprietà di i marchesi in Corsica sò state offerte à u munasteru di S. Venerio del Tino in La Spezia.



I Cortinchi : À u Xu seculu, Guglielmu, marchese di Cortona in Toscana, si stalla in Corsica grazie à u so ziu u vescu d'Aleria. Hà datu nascita à a famiglia di i Cortinchi. Pocu dopu à l'annu 1000, hà pigliatu a giurisdizione ch'è u contu Arrigo Bel Messer li avia datu in governu. I so eredi allargonu a signoria in a pieve di Venacu. U primu ripresentante di sta famiglia ch'è apparisce in a documentazione scritta prima di u XVu seculu, hè Guidu, figliolu d'Ansaldo. In u ghjumentu di fideltà ch'è sta famiglia presta à a cumuna di Genova l'11 di nuvembre di u 1289, pare ch'è Ugo Cortinco di Petra'Ellerata hè u capimachja di a razza è di a signoria; U castellu di Petralerata hè tenutu da u so figliolu è da u so nipote - figliolu di a so surella - ch'è sò chiamati *castellani*.

U "paese curtincu" include a Castagniccia, dinù e pieve di a Casinca è di u venachese. Hè un gran duminiu unificatu da i Cortinchi à u XIVu seculu, ma ch'è, finu à allora, ferma indivisu in mani à parechji ceppi sfarenti.

À u u XIIIu seculu, i signori di Loretu di Casinca, i marchesi di Massa è di Corsica è i Cortinchi, si disputanu a pieve di Casinca, un territoriu assai populatu, riccu, à u cruciamentu di strade impurtante. A pieve hè sottu à l'autorità di i signori di Loretu ch'è tenenu parechje furtificazione. Duranti u seculu, i Cortinchi, già impiantati à a cunfina di l'Ampugnani, provanu è a facenu à stende a so autorità nantu à una parte di a Casinca.

I Cortinchi di Petrelerata sò ripresentati da i fratelli nemici: Ugo, maritatu cù a figliola di Giudice de Cinarca è cun quale quale hà ottu figlioli, è Guglielmo, maritatu cù a figliola di Manuele de Mari ch'è li hà datu trè figlioli. Hè à st'epica a famiglia a più putente di a Corsica settentrionale. U titulu di signore di Petrelerata bench'è era solu u nome di un castellu era u titulu u più rispettatu di u Cismonte.

I Cortinchi di Lumito cuntrollavanu e pieve di u nordu di a Castagniccia è occupavanu e funzione pulitiche è religiose e più impurtante di stu settore (podestati, rettori, vescovi di Mariana). Questu ramu apparisce in a documentazione solu à a metà di u 12u seculu. U ramu purtava i tituli di Conti di Lumito è Conti d'Ampugnani (ramu maiurellu), signori di Vescovato (ramu minore)

I Cortinchi di Verde sò documentati da a prima metà di u XIVu seculu, dopu à avè pigliatu a signoria di i Marchesi di Verde, sempre mentuvata in u 1289. Sarebbe a signiuria a più mudesta. In u 1354, l'unicu castellu si trova in e mani di Guglielmo, suldatu di u vescu d'Aleria. U titulu maiò di stu ramu hè quellu di Marchese di Verde è Conte di Muriani.

Una di e ragioni di a so scumparsa hè a rivolta contru à i signoru di u 1358, dopu à a distruzione purtata da e truppe di Luchetto Doria in u 1289.

A rivolta di a Terra del comune

In u 1358, una parte di a pupulazione isulana, appruffittendu di a situazione di crisi è di u sustegnu di i Genuvesi s'hè rivultata contru à l'oppressione di e grande famiglie signorile. Stu movimentu hà per capimachja un certu Sambucucciu d'Alandu è un certu Francescu d'Evisa. A rivolta popolare purtò una riorganizzazione generale di e strutture pulitiche e amministrative, l'isula hè posta sottu à l'autorità di un governatore genuvese. L'antiche signorie sò sgassate è rimpiazzate da una nova divisione chì piglia cum'è stalca a pieve.

Hè dapoi sta rivolta chì a Corsica hè spartuta in dui parte: U Cismonte è u Pumonte, A Terra di u Cumunu è a Terra di i Signori.

À u sud, in Pumonte, i signori cinarchesi, anu riesciutu à ritruvà a so autorità. Hè u stessu affare in Capicorsu. In u centru Corsica, i signori sò aghjaccati è ghjè sta parte di l'isula chì si chjamava Terre di u Cumunu (terra del comune di pettu à a terra di i signori), pò esse perchè i ribelli fussinu allora sottu à a prutezzione di a Republica di Genova. In u 1358, u Genuvese Leonardo Montaldo riceve in Calvi a *deditio* di a Corsica à a Republica di Genova in nome di u populu corsu. In u 1365, Genova manda à Tridano della Torre da governatore in l'isula ma li tocca à affruntà i cunflitti trà dui partiti: i Caggionacci è i Ristagnacci. Tridano della Torre hè assassinatu da i Caggionacci. Genova hà dopu mandatu un governatore per ogni clanu. Genova sorte vitturiosa di u cunflittu cù l'Aragone ma deve cunfruntassi à i nobili corsi più putenti.

In u 1366, i Cortinchi è i Bagnaia, assuciati cù i De Mari è l'Avogari, fiascanu in a so prova per assassinà u governatore è per a ricuperà i so territori è e so avantaghji. Secondu à a cronaca di Giovanni della Grossa, u movimentu insurreziunale riesce rapidamente à distrughje tutti i castelli fora di sei furtificazione.

A rivalità trà i Corsi feudali, i partiti genovesi è u Papa Eugeniu u IV s'è compie in u 1453 cù u trasferimentu di u governu di l'isula à una banca, l'Uffiziu di San Ghjorghju. L'Uffiziu mette in anda a custruzione di torre nantu à e coste è di e città furtificate: Aiacciu (1492), Purtivechju (1539).

U più famosu cronista di u Medievu, Giovanni della Grossa :

Giovanni della Grossa hè un scrittori corsu, natu l'11 di dicembri di u 1388 in Grossa, un paisucciu di Corsica Suttana, vicinu à Sartè. Stu locu, situatu inde u Pumonti sionti a terminulugia di l'epica, facia parti di a signuria Rocca. Ghjuvanni della Grossa hà amparatu a grammatica in Bunifaziu eppo, cum'è tutti i Corsi bramosi di struisca si, hè partitu à cuntinuà i so studii in Napoli. Diventatu nutariu, della Grossa hà sirvutu guasgi tutti i signori di l'epica : Andria Lomellino, Vincentello d'Istria, Simone da Mare, a famidda Fregosi, ecc.

Hà fattu un'opara maiò : quidda di a storia corsa, dipo l'origini sin'à a so epica. Pà a storia di a Corsica innanzu à a so epica, Giovanni della Grossa s'hè sirvutu di scritti di scrittori scunnisciuti da tutti, hà cunsultatu archivi, s'hè appughjatu annantu à raconti urali, è hè ancu andatu à veda vistichi architetturali pà virificà chì i raconti ch'eddu sintia currispundiani à a rialità. Pà a Corsica à a so epica, i so scritti sò d'un'affidabilità maiò, grazia à a so carriera

prufizionali è à a so vicinanza incù i puteri successivi di u so tempu. A so opara si compii in u 1464, chì saria allora l'annata di a so morti.


Ma a so opara, ben chì munimentali è strà affidabili, fù monda criticata par via di i miti è di ligendi chì ci si truvaiani. Par asempiu, a ghjenti l'hà rimpruvatu d'avè parlatu di u mitu di u cavallieru rumani Ugo Colonna, chì saria statu mandatu da u papatu pà ricunquistà a Corsica, allora in mani à i Sarracini. Stu parsunaghju, divintatu allora u fundatori d'un ceppu suzzarinu, quiddu d'i Cirnachesi, ùn saria micca assistutu sionti i sturiani. Certi ricusani u scrittu di della Grossa di legittimà a duminazioni di i Cinarchesi, d'altri d'essa statu d'accunsentu incù a duminazioni genuvesi è d'avè ni fattu a prupaganda.

U so scrittu uriginali « Cronica Corsesca » ùn hè micca statu ritrovu sin'à a nostra epica : l'avemu avutu pà via di qualchì copia. Malgradu u travaddu spripusitatu di i cupiatori, qualchì pagina sò stati persi, certi sbagli è impricisioni sò stati fatti, u scrittu ne hà allora patutu è hà avutu parechji trasfurmazioni.

Giovanni della Grossa ispirò parechji corsi : autori cum'è Pier Antonio Monteggiani (sin'à u 1524), Marcantonio Ceccaldi (sin'à u 1559) anu cercu à seguità a so opara, ma ùn sò stati publicati. Solu Anton Pietro Filippini ripidda l'opara di della Grossa è di i so successori, è a publicheghja in u 1594, incù a soia, chì si pianta allora à sta data quì sottu à u nomi di Istoria di Corsica. I scritti di della Grossa ci sò riscritti è cummintati.

In u 1888, l'abbati Letteron, professori di lettari in Bastia, traduci è publicheghja torna a cronica di Filippini. In u 1910, publicheghja una virsioni più mittitoghja di a cronica di della Grossa, u manuscrittu Y di a bibliuteca di Bastia. In u 1998, Mathée Giacomo-Marcellesi è Antoni Casanova publicheghjani una virisioni bislingua di st'opara. Pudeti truvà l'opara maiò di della Grossa sottu à l'edizioni La marge.

Chjara Maria Tomasi, Rivista TEMPI, maghju di u 2018



Lettera di Giovanni della Grossa, Archivio di Stato di Genova

Un pezzu di a cronaca :

[...] E tutta Corsica si governava. Li Signori di vassalli ognuno era signore libero che poteva far alto e basso (1) come li piaceva in la loro signoria. E molti gentilihomini di li grandi dominavano li popoli dove loro si trovavano che non era di signori. E li puopoli restavano da tuttimaltrattati, e tanto che a la fine non potero più sopportare quelli popoli di Marana e dil dominio de Cortinchi (2) ; e pigliorno quelli altri popoli animatisi li uni con li altri le arme a le mani, e si appoderorno³ di tutti li castelli di li signori di Corsica e li disfeciero (4) tutti da Bonifacio a Calvi in poi che teneano per Gienovesi ; e lasciorno il castello di Cinarca e di Biguglia. [...] e lassorno ancora il castello di Nonza e di San Colombano, cioè di Capo Corso [...] Dopo avere facto questa ribellione contra a tutti li Signori di Corsica e unione di popolo, tennero fra loro parlamento e consiglio di quel che aveano di fare per dare forma al buon governo e che fusse durabile, e fu concluso di mandare quattro ambasciatori a Gienova a tractare con il Duscie (5) e suo consiglio che li diano governatore per governare Corsica. E fu questa rivolta l'anno dopoi la natività del signore 1358. [...] E Sambucuccio d'Alando e Franceschino d'Omessa, capi di li popoli, subito andorno tutti dui a Genova aprocurare (6) che venisse governatore in Corsica con ogni brevità.

Cronaca di Giovanni della Grossa (a rivolta di Corsica è a so Deditio à Genuva)


1. Facianu cum'ella li paria. 2. Signori di u centru di a Corsica. 3. Piglionu u pusessu. 4. Spiantonu. 5. Par « Duce » quellu ch'era elettu capu di a Ripublica di Ghjenuva (in altrò u chjamavanu « Doge »). 6. Pricurà, dumandà.

A vostra cuntribuzione !

1 - L'arte romanicu hè un'arte cumunu à l'Europa sana, ma di manera sfarente. Cunniscite lochi induve omu pò truvà castelli o chjese rumaniche? Cumu si puderia sviluppà un prugettu in giru à stu patrimoniu ?

2 – Cuniscite d'altre famiglie signorile di Corsica, di quelli tempi di u Medievu ? Qualesse è induve eranu i so duminii ?

3 – Piazzemu i lochi di e signorie nantu à a sta carta muderna di a Corsica :



4 – Cosa ci ferma oghje, di tempi di u medievu (u primu, quellu di Pisa) ?

Riferenze è risorse

- Daniel Istria : *Pouvoirs et fortifications dans le nord de la Corse : XIe-XIVe siècle*, edizione Alain Piazzola, Ajaccio, 2005
- Denis Luciani : *Storia di Corsica illustrata*, CRDP di Corsica, 2014
- Chjara Maria Tomasi : *Giovanni della Grossa* in Rivista TEMPI, maghju di u 2018
- Gérard Giorgetti - 50 documenti pà una storia di a Corsica (CRDP), 2006
- Wikipedia
- [https://www.educorsica.fr/storia di a corsica/](https://www.educorsica.fr/storia_di_a_corsica/)